

Ministarstvo pravde i uprave

Na osnovu člana 44. stav 7. Krivičnog zakona Federacije Bosne i Hercegovine ("Službene novine Federacije BiH", broj 36/03, 37/03 - ispravka, 21/04 - ispravka, 69/04, 18/05 i 42/10) i člana 56. stav 2. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05), ministar pravde i uprave Kantona Sarajevo, donosi

PRAVILNIK

O IZVRŠAVANJU RADA ZA OPĆE DOBRO NA SLOBODI

POGLAVLJE I - OPĆE ODREDBE

Član 1.

(Predmet i organ izvršenja)

- (1) Ovim pravilnikom uređuje se izvršavanje sudske odluke o zamjeni kazne zatvora radom za opće dobro na slobodi (u daljem tekstu: rad za opće dobro), izrečene u skladu sa članom 44. Krivičnog zakona Federacije Bosne i Hercegovine.
- (2) Zamjena kazne zatvora radom za opće dobro može se primijeniti i u slučajevima kada se odlukom suda novčana kazna zamjenjuje kaznom zatvora, shodno članu 47. Krivičnog zakona Federacije Bosne i Hercegovine.
- (3) Rad za opće dobro izvršava Ministarstvo pravde i uprave Kantona Sarajevo (u daljem tekstu: Ministarstvo pravde).

Član 2.

(Trajanje, upućivanje, mjesto i troškovi izvršavanja rada za opće dobro)

- (1) Rad za opće dobro izvršava se u trajanju određenom pravosnažnom sudskom presudom.
- (2) Rok za upućivanje osuđenog lica na rad za opće dobro ne može biti kraći od jednog mjeseca niti duži od jedne godine od dana dostavljanja Ministarstvu pravde pravosnažne presude suda.
- (3) Rad za opće dobro izvršava se, u pravilu, u mjestu prebivališta, odnosno boravišta osuđenog lica.
- (4) Osuđeno lice ne snosi troškove izvršavanja rada za opće dobro niti plaća takse na podneske, službene radnje i odluke u vezi s primjenom ovoga zakona.
- (5) Rad za opće dobro je besplatan i ne služi postizanju dobiti poslodavca.

Član 3.

(Svrha izvršavanja i poseban cilj rada za opće dobro)

Svrha izvršavanja rada za opće dobro je da se, uvažavajući opću svrhu krivično-pravnih sankcija, osuđeno lice kojem je, pod određenim uslovima i obavezama, ograničena sloboda, ne isključi iz društva, već da, uz pomoć i nadzor društvene zajednice, dobrovoljno, ličnim postupcima, radom i odnosom prema posljedicama izazvanim počinjenim djelom, razvije svijest o štetnosti određenih ponašanja i odgovornosti za štetne posljedice.

Član 4.

(Obaveze državnih organa i drugih lica)

Državni organi, ustanove i druga pravna lica, kao i fizička lica, dužni su saradivati s Ministarstvom pravde, u izvršavanju rada za opće dobro, kad to Ministarstvo pravde od njih zatraži.

Član 5.

(Organizacije kod kojih se obavlja rad za opće dobro i djelatnost)

- (1) Rad za opće dobro može se obavljati u organizacijama od javnog interesa osnovanim na području Kantona, koje obavljaju javnu djelatnost u okviru koje se može ostvariti opća svrha izvršavanja krivično-pravnih sankcija i posebna svrha izvršavanja rada za opće dobro (u daljem tekstu: poslodavac).
- (2) Javna djelatnost poslodavca mora biti humanitarna, ekološka, komunalna, uslužna, kao i svaka druga djelatnost za koju Ministarstvo pravde ocijeni da se sa njom može postići opća svrha izvršavanja krivično-pravnih sankcija, kao i posebna svrha izvršavanja rada za opće dobro.

Član 6.

(Lista poslodavaca)

Ministarstvo pravde utvrđuje listu poslodavaca iz člana 5. ovog pravilnika, koji obavljaju poslove od javnog interesa i kod kojih se izvršava rad za opće dobro, kao što su: komunalna preduzeća, šumsko-privredna preduzeća, domovi za starija i nemoćna lica, domovi za psihički bolesna odrasla lica, nevladine organizacije, narodne kuhinje, Caritas/Preporod/La benevolencija/ Merhamet, Crveni križ/krst, organizacije lica sa posebnim potrebama, bolnice i slične organizacije.

Član 7.

(Nadležnost za raspoređivanje osuđenih lica na rad za opće dobro i mjere koje preduzima Ministarstvo pravde)

- (1) Ministarstvo pravde raspoređuje osuđeno lice na rad za opće dobro, određuje vrstu posla na kojem će se obavljati rad za opće dobro, vodeći računa o sposobnostima i znanjima osuđenog lica.
- (2) Ministarstvo pravde neposredno preduzima mjere za poboljšanje izvršavanja rada za opće dobro, pruža stručnu pomoć, prikuplja i obrađuje statističke podatke, te obavlja i druge poslove propisane ovim pravilnikom i drugim propisima.
- (3) Ministarstvo pravde saraduje s drugim državnim organima, naučnim i drugim ustanovama, strukovnim udruženjima, drugim pravnim licima i pojedincima, radi poboljšavanja uslova izvršavanja rada za opće dobro i pomoći osuđenim licima na radu za opće dobro.
- (4) Ministarstvo pravde, kada je to u javnom interesu ili kada to ocijeni potrebnim, obavještava javnost o uslovima i stanju izvršavanja rada za opće dobro, radi uključivanja društvene zajednice u postupke izvršavanja.

POGLAVLJE II - NAČELA IZVRŠAVANJA RADA ZA OPĆE DOBRO

Član 8.

(Zabrana nezakonitog postupanja i diskriminacije)

- (1) Rad za opće dobro izvršava se na način koji osuđenom licu i njegovoj porodici jamči poštovanje ljudskog dostojanstva, osnovnih prava i sloboda i privatnosti.
- (2) Zabranjuje se diskriminacija zasnovana na rasi, boji kože, spolu, jeziku, religiji ili vjerovanju, političkim ili drugim uvjerenjima, nacionalnom i socijalnom porijeklu.
- (3) Osuđeno lice koje je bio podvrgnuto nezakonitom postupanju ili diskriminaciji iz stava (2) ovog člana ima pravo na naknadu štete.
- (4) Pod pojmom osuđeno lice, državni službenik, povjerenik, ministar i rukovodilac pravnog lica podrazumijevaju se osobe oba spola.

Član 9.
(Prigovor osuđenog lica)

Osuđeno lice ima pravo da uloži prigovor na odnos prema njemu, za vrijeme izvršavanja rada za opće dobro, koji je suprotan odredbama ovog pravilnika, kao i da traži da se izvršavanje rada za opće dobro prilagodi njegovim potrebama, u skladu s ovim pravilnikom.

Član 10.
(Individualni program izvršavanja rada za opće dobro)

- (1) Rad za opće dobro izvršava se prema individualnom programu izvršavanja, u skladu s ovim pravilnikom.
- (2) Individualni program iz stava (1) ovog člana utvrđuju državni službenik i povjerenik za svako osuđeno lice, a na osnovu osobina ličnosti, ličnih prilika, zdravstvenog stanja, prethodnog zaposlenja, sposobnosti i stručnosti tog lica.

POGLAVLJE III - ORGANI, LICA I NAČIN IZVRŠAVANJA RADA ZA OPĆE DOBRO

Član 11.
(Državni službenik i povjerenik)

- (1) Ministarstvo pravde izvršava pravosnažnu presudu o zamjeni kazne zatvora radom za opće dobro, putem državnog službenika Ministarstva pravde i povjerenika.
- (2) Povjerenik je zaposlenik poslodavca kod kojeg se obavlja rad za opće dobro, kojeg, na prijedlog poslodavca, rješenjem imenuje ministar pravde (u daljem tekstu: povjerenik) i koji obavlja neposredni nadzor nad izvršavanjem rada za opće dobro.
- (3) Državni službenik iz stava (1) ovog člana može biti lice koji ima završenu visoku stručnu spremu, radno iskustvo u trajanju od najmanje tri godine i primjerene ljudske osobine koje mogu biti uzor ponašanja osuđeniku.
- (4) Povjerenik ne mora imati visoku stručnu spremu, ukoliko poslodavac nema odgovarajućih zaposlenika visoke stručne spreme, ali mora ispunjavati ostale uslove iz stava (3) ovog člana.
- (5) Za svoj rad, državni službenik i povjerenik odgovorni su ministru pravde.

Član 12.
(Stručna obuka)

- (1) Ministarstvo pravde organizuje stalnu stručnu obuku državnih službenika i povjerenika iz člana 11. ovog pravilnika, radi sticanja, održavanja i usavršavanja njihovih znanja, sposobnosti i vještina, koje će omogućiti afirmaciju rada za opće dobro na stručan, društveno koristan i efikasan način i u skladu s etičkim standardima profesije iz oblasti izvršenja krivičnih sankcija.
- (2) U organizovanju obuke Ministarstvo pravde može zatražiti pomoć od kantonalnih ministarstava nadležnih za zdravstvo, rad i socijalnu zaštitu, obrazovanje i sport, a po potrebi i drugih državnih organa, ustanova, udruženja i pojedinih stručnjaka (socijalni radnik, pedagog, psiholog, penolog i sl.).
- (3) Ministar pravde donosi Uputstvo o načinu rada, odgovornosti i obučavanju povjerenika.

POGLAVLJE IV - IZVRŠAVANJE RADA ZA OPĆE DOBRO

Član 13.
(Ugovor o izvršavanju rada za opće dobro i evidencija poslodavaca i poslova)

- (1) Ministar pravde zaključuje ugovore s poslodavcima iz člana 5. ovog pravilnika o postojanju zajedničkog interesa za izvršavanje rada za opće dobro i upućivanju osuđenog lica na rad za opće dobro.

(2) Zajednički interes iz stava (1) ovog člana sastoji se u obezbjeđenju postizanja svrhe i posebnih ciljeva rada za opće dobro i besplatnog rada osuđenika u korist poslodavca.

(3) Ugovor iz stava (1) ovoga člana sadrži: opis djelatnosti poslodavca, vrste poslova na kojima osuđeno lice može izvršavati rad za opće dobro, mjesto izvršavanja rada za opće dobro, spisak lica koja mogu biti imenovana za povjerenike, vrijeme trajanja ugovora, uslovi pod kojima se može raskinuti ugovor, prava i obaveze Ministarstva pravde i poslodavca i druga pitanja od značaja za izvršavanje rada za opće dobro.

(4) Ministarstvo pravde vodi evidenciju poslodavaca s kojima su zaključeni ugovori iz stava (1) ovog člana i popis radnih mjesta na kojima se može izvršavati rad za opće dobro, u posebnoj knjizi, u kojoj je na svakoj stranici evidentiran po jedan poslodavac, a prema Obrascu 1, koji je sastavni dio ovog pravilnika.

Član 14.

(Prva obuka povjerenika, uvjerenje i evidencija uvjerenja)

(1) Nakon zaključivanja ugovora iz člana 13. ovog pravilnika, Ministarstvo pravde organizuje obuku lica sa spiska lica koja mogu biti imenovana za povjerenike.

(2) O uspješno završenoj obuci, Ministarstvo pravde izdaje povjereniku uvjerenje i vodi evidenciju izdatih uvjerenja.

Član 15.

(Rješenje o imenovanju povjerenika)

(1) Ministar pravde donosi rješenje o imenovanju povjerenika, u roku od osam dana od prijema pravosnažne presude.

(2) Rješenjem o imenovanju povjerenika određuju se prava i obaveze povjerenika, period za koji se povjerenik imenuje i ime i prezime osuđenog lica kojeg nadzire u obavljanju rada.

Član 16.

(Evidencija povjerenika, iskaznica i evidencija iskaznica povjerenika)

(1) Ministarstvo pravde vodi evidenciju imenovanih povjerenika u posebnoj knjizi, u kojoj je na svakoj stranici evidentiran po jedan povjerenik, prema Obrascu 2, koji je sastavni dio ovog pravilnika.

(2) Ministarstvo pravde izdaje posebnu iskaznicu povjereniku, koja sadrži: naziv "Iskaznica povjerenika, ime i prezime povjerenika i JMBG, fotografiju povjerenika, mjesto, datum izdavanja i broj iskaznice i pečat Ministarstva pravde.

(3) Ministarstvo pravde vodi evidenciju o izdatim i vraćenim iskaznicama.

Član 17.

(Rokovi za obavljanje razgovora s osuđenim licem i izradu pojedinačnog programa rada)

(1) U roku od 8 dana od prijema rješenja o imenovanju povjerenika iz člana 15. ovog Pravilnika, državni službenik i povjerenik obavice razgovor sa osuđenim licem, radi izrade individualnog programa izvršavanja rada za opće dobro.

(2) Osuđenom licu saopćice se da je dužno obaviti ljekarski pregled i dostaviti Ministarstvu pravde uvjerenje o zdravstvenoj sposobnosti, radi utvrđivanja zdravstvene sposobnosti za obavljanje poslova na koje se raspoređuje i izrade individualnog programa rada, najkasnije u roku od 5 dana od dana obavljenog razgovora.

(3) U roku od 7 dana od dana obavljenog razgovora iz stava (1) ovog člana, državni službenik i povjerenik dužni su izraditi individualni program izvršavanja rada za opće dobro za osuđeno lice i dostaviti ga ministru pravde, radi donošenja rješenja o raspoređivanju na rad za opće dobro i utvrđivanja utvrđivanja individualnog programa izvršavanja rada za opće dobro.

Član 18.

(Rješenje o raspoređivanju na rad za opće dobro)

- (1) Ministar donosi rješenje o raspoređivanju osuđenog lica na rad za opće dobro i upućuje ga na rad za opće dobro, u roku ne kraćem od mjesec dana od prijema pravosnažne presude.
- (2) Prije donošenja rješenja iz stava (1) ovog člana, državni službenik upozna je osuđeno lice sa individualnim programom rada za opće dobro, a osuđeno lice potpisuje izjavu da je upoznato s individualnim programom rada.
- (3) Rješenjem iz stava (1) ovog člana osuđeno lice se raspoređuje na poslove na kojima se izvršava rad za opće dobro, u skladu s odredbama ovog pravilnika i određuje se početak, raspored i završetak izvršavanja rada za opće dobro, na osnovu prethodnog dogovora s poslodavcem.
- (4) Vrijeme izvršavanja rada za opće dobro, zavisno od potrebe, vrste i mjesta rada, po prijedlogu osuđenog lica, može se, izmjenom rješenja, prilagoditi potrebama tog lica.
- (5) Ministarstvo pravde obavještava sud koji je donio presudu o početku izvršavanja rada za opće dobro.

Član 19.

(Uslovi rada za opće dobro)

- (1) Na radno vrijeme osuđenog lica, odmor u toku rada, dnevni i sedmični odmor i upotrebu sredstava zaštite na radu, primjenjuju se opći propisi o radu i zaštiti na radu i opći akti poslodavca.
- (2) Poslodavac osigurava osuđeno lice od nezgoda na poslu i profesionalnih oboljenja za vrijeme izvršavanja rada za opće dobro.
- (3) Osuđeno lice je odgovorno za štetu koju, namjerno ili grubom nepažnjom, prouzrokuje poslodavcu za vrijeme izvršavanja rada za opće dobro.

Član 20.

(Odgoda i prekid izvršavanja rada za opće dobro)

- (1) Izvršavanje rada za opće dobro može biti odgođeno ili prekinuto na molbu osuđenog lica, njegovog branitelja ili centra za socijalni rad.
- (2) Molba se podnosi Ministarstvu pravde, a u molbi se moraju navesti razlozi i dokazi o činjenicama koje opravdavaju odgodu ili prekid pod okolnostima utvrđenim odredbama federalnog zakona kojima se reguliše izvršenje krivičnih sankcija, a koje se odnose na odlaganje i prekid izvršenja kazne zatvora.
- (3) Molba za odgodu izvršavanja rada za opće dobro može se podnijeti u roku od 3 dana od dostavljanja rješenja o rasporedu na rad za opće dobro, a nakon proteka toga roka, ako su razlozi za odgodu nastali kasnije, a izvršavanje rada za opće dobro još nije započeto, ali ne kasnije od četrdeset osam sati po saznanju za njihovo postojanje.
- (4) Molba zadržava izvršavanje rješenja o rasporedu na rad za opće dobro.
- (5) Molba za prekid izvršavanja rada za opće dobro može se podnijeti u roku od dvadeset četiri sata od nastupanja okolnosti koja je razlog za prekid.
- (6) Molba zadržava izvršavanje rješenja o rasporedu na rad za opće dobro.
- (7) Rješenje o odgodi, odnosno rješenje o prekidu izvršavanja rada za opće dobro donosi ministar pravde, u roku od 3 dana od prijema molbe.

Član 21.
(Žalba)

- (1) Protiv rješenja kojim se odbija ili odbacuje molba za odgađanje ili prekid izvršenja rada za opće dobro, osuđeno lice ima pravo žalbe ministru pravde, u roku od 3 dana od prijema rješenja.
- (2) Žalba zadržava izvršavanje rješenja o rasporedu na rad za opće dobro.
- (3) Ministar pravde dužan je donijeti rješenje po žalbi iz stava (1) ovog člana u roku od 3 dana od prijema žalbe.
- (4) Protiv rješenja iz stava (3) ovog člana ne može se pokrenuti uspravni spor.

Član 22.
(Razlozi i trajanje odgode i prekida izvršavanja rada za opće dobro)

- (1) Razlozi za odgodu ili prekid izvršavanja rada za opće dobro su:
 - a) iznenadno oboljenje osuđenog lica,
 - b) smrtni slučaj, teška bolest ili nastupanje okolnosti u kojima je, prema mišljenju centra za socijalni rad, osuđeno lice postalo jedini obavezni osiguravatelj brige o maloljetnoj djeci, bračnom ili vanbračnom drugu, roditelju, usvojitelju ili usvojeniku,
 - c) potreba obavljanja ili dovršenja radova izazvanih elementarnom nepogodom ili drugom nesrećom, zbog čijeg neobavljanja bi nastala znatna materijalna šteta, a u užoj porodici osuđenog lica nema drugog radno- sposobnog lica.
- (2) Osim u slučajevima iz prethodnog stava, Ministarstvo pravde može, izuzetno, i u drugim opravdanim slučajevima, prekinuti izvršavanje rada za opće dobro, ali ne na period duži od perioda utvrđenog u stavu (4) ovog člana.
- (3) Postojanja razloga iz st. (1) i (2) ovog člana, osuđeno lice dokazuje odgovarajućom potvrdom ili drugom ispravom.
- (4) Izvršavanje rada za opće dobro iz razloga iz stava (1) tačke a) ovoga člana može se odgoditi ili prekinuti dok bolest traje; zbog razloga iz tačke b) najduže do dvadeset dana; zbog razloga iz tačke c) do dovršetka posla, a najduže do dvadeset dana, a u slučaju iz stava (2) ovoga člana najduže do 3 dana.
- (5) Ponovljene odgode izvršavanja rada za opće dobro ne mogu trajati ukupno duže od 6 mjeseci.
- (6) U slučaju ponovljene odgode izvršenja rada za opće dobro zbog bolesti osuđenog lica, koja traje duže od 6 mjeseci, Ministarstvo pravde o tome obavještava sud koji je izrekao presudu, koji donosi odluku o daljem izvršavanju presude.
- (7) Ponovljeni prekidi izvršavanja rada za opće dobro ne mogu trajati duže od trideset dana.
- (8) U slučaju ponovljenog prekida izvršenja rada za opće dobro zbog bolesti osuđenog lica koja traje duže od trideset dana, Ministarstvo pravde o tome obavještava sud koji je izrekao presudu, koji donosi odluku o daljem izvršavanju presude.
- (9) Na odgodu vojnim licima shodno se primjenjuju odredbe zakona kojim se reguliše odgoda izvršavanja kazne zatvora vojnim licima.
- (10) Odgoda i prekid izvršenja rada za opće dobro ne može se odobriti ako će zbog odgode ili prekida izvršenja nastupiti zastarjelost izvršenja rada za opće dobro.

Član 23.

(Ovlaštenja i obaveze državnog službenika i povjerenika)

- (1) Prilikom upućivanja osuđenog lica na rad za opće dobro, državni službenik upoznaje osuđeno lice sa pravima i dužnostima u toku izvršavanja rada za opće dobro, načinom na koji može ostvarivati svoja prava i posljedicama neurednog izvršavanja ili neizvršavanja rada za opće dobro.
- (2) Povjerenik je dužan osuđeno lice uvesti u posao, pružiti mu potrebnu pomoć i zaštitu, te u saradnji sa državnim službenikom, nadgledati ispunjenje obaveze rada za opće dobro.
- (3) Državni službenik može povjereniku davati bliža uputstva i određivati uslove za izvršavanje rada za opće dobro.
- (4) Državni službenik dužan je, najmanje nakon polovine vremena rada osuđenog lica, izvršiti lični uvid u izvršenje rada za opće dobro i o tome unijeti zabilješku u lični karton tog lica.

Član 24.

(Matična knjiga, registar i lični karton)

- (1) U Ministarstvu pravde vodi se matična knjiga, registar i lični karton osuđenih lica.
- (2) Povjerenik vodi lični karton za svako osuđeno lice nad kojim vrši nadzor (kontrolu).
- (3) Uputstvo o matičnoj knjizi osuđenih lica, registru i ličnom kartonu donosi ministar pravde.

Član 25.

(Sadržaj matične knjige)

Matična knjiga sadrži lične podatke o osuđenom licu, podatke o pravosnažnoj sudskoj presudi, o vremenu i mjestu izvršavanja rada za opće dobro, kao i druge podatke, u skladu sa uputstvom iz člana 24. stav (3) ovog pravilnika.

Član 26.

(Lični karton)

- (1) Za svako osuđeno lice u Ministarstvu pravde vodi se lični karton.
- (2) U lični karton se upisuju podaci o osuđenom licu i ulaže dokumentacija potrebna za praćenje zakonitosti izvršavanja rada za opće dobro, a posebno:
 - pravosnažna presuda,
 - rješenje o raspoređivanju na rad za opće dobro i druge odluke koje se odnose na rad za opće dobro i njegovo izvršavanje,
 - program izvršavanja rada i njegove izmjene,
 - zabilježbe o zapažanjima i mišljenjima državnog službenika i povjerenika,
 - obavještenja povjerenika o izvršavanju, odnosno zanemarivanju izvršavanja rada za opće dobro,
 - prigovor osuđenog lica i odluka ministra pravde po prigovoru,
 - izvještaj povjerenika o završenom radu za opće dobro,
 - zaključni izvještaj o obavljenom radu za opće dobro.
- (3) Povjerenik vodi lični karton osuđenog lica, u koji upisuje podatke i ulaže dokumentaciju potrebnu za praćenje izvršavanja rada za opće dobro, a posebno:
 - a) pravosnažna presuda,

- b) rješenje o raspoređivanju na rad za opće dobro i druge odluke koje se odnose na rad za opće dobro i njegovo izvršavanje,
 - c) program izvršavanja i njegove izmjene,
 - d) zapažanja i mišljenja povjerenika,
 - e) izvještaj o radu i ponašanju osuđenog lica,
 - f) izvještaj o završetku rada za opće dobro.
- (4) Osuđeno lice ima pravo uvida u sve podatke iz ličnog kartona.

Član 27.

(Zanemarivanje obaveze rada za opće dobro)

- (1) Zanemarivanjem obaveze rada za opće dobro smatra se: kašnjenje na rad, neopravdano izostajanje s rada, napuštanje rada i namjerno dovođenje sebe u stanje umanjene radne sposobnosti, namjerno oštećenje sredstava za rad, nepoštivanje organizacije i načina rada, ponašanje i odnosi sa zaposlenicima poslodavca ili korisnicima rada koji ne doprinose ostvarenju posebnog cilja toga rada.
- (2) U slučaju iz stava (1) ovoga člana, povjerenik, bez odlaganja, obavještava Ministarstvo pravde.
- (3) U slučaju ponovljenog zanemarivanja obaveze rada za opće dobro, poslodavac može raskinuti ugovor iz člana 13. ovog pravilnika, pod uslovima utvrđenim ugovorom.
- (4) Poslodavac je dužan, pismeno i bez odlaganja, obavijestiti Ministarstvo pravde o namjeri raskidanja ugovora, a Ministarstvo pravde o tome odmah obavještava sud koji je donio odluku o zamjeni kazne zatvora radom za opće dobro.
- (5) Ukoliko sud ne odluči da osuđeno lice vrati na izdržavanje kazne zatvora, Ministarstvo pravde obavezno je tom licu obezbijediti izvršenje rada za opće dobro kod drugog poslodavca.

Član 28.

(Prigovor osuđenog lica)

- (1) Osuđeno lice ima pravo prigovora ministru pravde u vezi sa podacima u ličnom kartonu, na program rada i izvještaj povjerenika, te na odnos državnog službenika i povjerenika prema njemu za vrijeme rada za opće dobro koji je suprotan odredbama ovog pravilnika.
- (2) Državni službenik i povjerenik su dužni prigovore zabilježiti u lični karton osuđenog lica i dostaviti ih ministru pravde.
- (3) U roku ne dužem od 8 dana od prijema prigovora, Ministarstvo pravde dužno je saslušati osuđeno lice, državnog službenika i povjerenika i utvrditi opravdanost prigovora, a u daljem roku od tri dana dužno je dati pismeno uputstvo za otklanjanje opravdanih razloga prigovora ili odrediti drugog državnog službenika ili povjerenika nadležnog za to lice.
- (4) Ukoliko se utvrdi da prigovor nije opravdan, ministar pravde o tome obavještava osuđeno lice, koje ima pravo tražiti od suda koji je donio odluku o zamjeni kazne zatvora radom za opće dobro, da konačno odluči o prigovoru.

Član 29.

(Izvještaji)

- (1) O radu i ponašanju osuđenog lica, povjerenik podnosi izvještaj Ministarstvu pravde.

- (2) Izvještaj se podnosi nakon svake polovine izvršenog rada za opće dobro, a po potrebi i češće.
- (3) O zanemarivanju obaveze rada za opće dobro, povjerenik, bez odlaganja, obavještava Ministarstvo pravde, radi preduzimanja mjera propisanih ovim pravilnikom.
- (4) Nakon izvršenja rada za opće dobro, povjerenik podnosi Ministarstvu pravde izvještaj o završenom radu za opće dobro, najkasnije u roku od 8 dana od završetka rada za opće dobro.
- (5) Na osnovu izvještaja povjerenika o završenom radu za opće dobro, Ministarstvo pravde sačinjava zaključni izvještaj o obavljenom radu za opće dobro i dostavlja ga sudu koji je izrekao presudu.
- (6) Po proteku roka za izvršenje rada za opće dobro, Ministarstvo pravde podnosi sudu izvještaj o neizvršenju ili djelimičnom izvršenju rada za opće dobro i razlozima neizvršenja ili djelimičnog izvršenja rada za opće dobro.

POGLAVLJE V - NADZOR

Član 30.

(Nadzor nad provođenjem Pravilnika, izvršavanjem rada za opće dobro i nad radom povjerenika)

- (1) Nadzor nad provođenjem ovog pravilnika, nadzor nad izvršavanjem rada za opće dobro i nadzor nad radom povjerenika vrši Ministarstvo pravde, putem državnog službenika.
- (2) U vršenju nadzora nad radom povjerenika, državni službenik je dužan posebno:
 - a) unapređivati i nadzirati rad povjerenika,
 - b) sazivati zajedničke sastanke s povjerenicima, najmanje jedanput mjesečno,
 - c) stimulisati povjerenike na stručno usavršavanje,
 - d) podnositi ministru pravde godišnji izvještaj o svom radu.

Član 31.

(Razlozi zamjene povjerenika)

Tokom izvršavanja rada za opće dobro, Ministarstvo pravde može zamijeniti povjerenika iz slijedećih razloga:

- a) na zahtjev suda,
- b) u slučaju duže spriječenosti povjerenika za rad,
- c) zbog neispunjavanja obaveza iz rješenja o imenovanju povjerenika,
- d) zbog osnovane sumnje u nepristrasnost povjerenika.

POGLAVLJE VI - PRELAZNE I ZAVRŠNE ODREDBE

Član 32.

(Rok za donošenje provedbenih propisa)

Do dana primjene ovog pravilnika, ministar pravde donijet će:

- a) Uputstvo o matičnoj knjizi, registru i ličnom kartonu osuđenih lica,
- b) Uputstvo o načinu rada, odgovornosti i obučavanju povjerenika.

Član 33.

(Rok za izvršavanje obaveza Ministarstva pravde)

Do dana primjene ovog pravilnika, Ministarstvo pravde je dužno:

- utvrditi listu poslodavaca koji ispunjavaju uslove za obavljanje rada za opće dobro,
- zaključiti ugovore s poslodavcima o obavljanju rada za opće dobro,
- organizovati obuku povjerenika i
- obezbijediti uspostavljanje knjiga i evidencija propisanih ovim pravilnikom.

Član 34.

(Obavještavanje suda o mogućnosti izvršavanja rada za opće dobro)

Do početka primjene ovog pravilnika, Ministarstvo pravde obavijestit će nadležne sudove u Kantonu Sarajevo o mogućnosti izvršavanja rada za opće dobro, vrsti poslova i broju osuđenika koji mogu izvršavati rad za opće dobro.

Član 35.

(Stupanje na snagu)

Ovaj pravilnik stupa na snagu osmoga dana od dana objavljivanja u "Službenim novinama Kantona Sarajevo", a primjenjuje se od 15. aprila 2011. godine.

Broj 03-02-07-23248/09
6. septembra 2010. godine
Sarajevo

Ministar
Zlatko Mešić, s. r.